

# TEZAUUR LITURGIC

**9 Iunie**

## ACATISTUL SF. CUVIOS ALEXANDRU DE LA KUȘTA II



**MOSCOVA, 2000**



# АКАФИСТ ПРЕПОДОБНОМУ АЛЕКСАНДРУ КУШТСКОМУ

## Кондак 1

Иже плотским дебельством Богови работати изволи, в пустыню вселився, в нейже многими поты и труды безтелеснаго равноангельнаго пребывания возможе достигнута, таже от Бога узрен быв, сподобися великих чудес в жизни и по преставлении, на нечистыя духи силу восприим, изгониши от приходящих к тебе с верою, темже, отче Александре, за вся ны моли, спастися душам нашим.

## Икос 1

Ангельский нрав имел еси, отче преподобне Александре, и, яко бесплотный, непорочное житие совершил еси на земли, дивный образ совершенства духовного нам оставив, да подражаем добродетелям твоим и зовем: Радуйся, родителей благочестивых плод благославный.

Радуйся, рождением твоим радость им сотворивый.

Радуйся, от юности Бога всем сердцем возлюбивый.

Радуйся, любовь в сердце своем к Господу укоренивый.

Радуйся, преподобный Александре, светильниче всесветлый и вселюбимый!

### **Кондак 2**

Видя Господь душу твою, от юности к исканию Единого Господа потекшую, благодатного дарования исполнь, да в веселии зовем Ему: Аллилуиа!

### **Икос 2**

Разумом Богопросвещенным постигл еси суету мира сего, тем же вечных нетленных благ возжелал еси, отче преподобне, подвизая и нас звати тебе:

Радуйся, пустынного безмолвия любителю.

Радуйся, смирения рачителю.

Радуйся, державы вражия низложителю.

Радуйся, Господа верный служителю.

Радуйся, преподобный Александре, светильниче всесветлый и вселюбимый!

### **Кондак 3**

Силою Всевышняго осененный, непобедимым оружием Креста вооружился еси, побеждал еси всякую гордыню, непрестанно вопия: Аллилуиа!

### **Икос 3**

Имел еси слез источник изобильный, угодниче Божий, от преизбытка желания Божественного и любви ко Господу, тем же мы ублажаем тя, зовуще:

Радуйся, крепости и мужества тезоименитый подвижниче.

Радуйся, ангелоподобный человече.

Радуйся, молитвенниче неусыпный.

Радуйся, наставниче изрядный.

Радуйся, преподобный Александре, светильниче всесветлый и вселюбимый!

### **Кондак 4**

Бурею искушений невозможно поколебати храмину души твоея, основана бо бе на твердом камене веры и непреткновенно восходил к совершенству духовному поя Богу: Аллилуиа!

### **Икос 4**

Слышав похваляема себе от человек, убоялся еси превозношения суетного, отче Богомудре, и, яко истинный смирения образ, мирно и невозбранно Богу работал еси, тем же зовем:

Радуйся, смирившегося Господа благий последователю.

Радуйся, заповедей Его исполнителю.

Радуйся, украсивыйся дарами благодати Божия.

Радуйся, трудолюбче истинный.

Радуйся, преподобный Александре, светильниче  
всесветлый и вселюбимый!

### **Кондак 5**

Светозарный луч, просиявший в местах  
пустынных, был еси преподобне Александре,  
пламенеющим сердцем пел Господу песнь:  
Аллилуиа!

### **Икос 5**

Видеша Ангельския чины равноангельное житие  
твое, отче богоблаженне, ревности духа твоего  
удивишася и прославиша Бога, укрепляющего  
неможное естество человеческое, мы же  
ублажаем тя и поем:

Радуйся, иноков дивное украшение.

Радуйся, крине пустынного жития.

Радуйся, древо небесного насаждения.

Радуйся, преподобием и правдою одеянный.

Радуйся, преподобный Александре, светильниче  
всесветлый и вселюбимый!

### **Кондак 6**

Проповедники подвигов твоих явишася иноцы  
обители Куштския, видя тя во плоти Ангела,  
знамение благодатного зренья на лице своем  
носящего, во умилении сердца возопиша Богу:  
Аллилуиа!

## **Икос 6**

Возсиял еси, яко светило Богосветлое в земли северней, на стезю спасения наставив души человеческия, тем же тя, яко сотворившего и научившего, похвалами ублажаем сими:

Радуйся, источниче Боговдохновенных учений.

Радуйся, хранилище преизобильное умилений.

Радуйся, одушевленная скрижаль закона Господня.

Радуйся, неумолчный проповедниче Евангелия Христова.

Радуйся, преподобный Александре, светильниче всесветлый и вселюбимый!

## **Кондак 7**

Хотя Человеколюбец Господь прославить место подвигов твоих, посла Ангела благовестить тебе, яко на том месте обитель иноком будет во спасение, ты же, явлением бесплотного просвещен, с радостным трепетом взывал: Аллилуиа!

## **Икос 7**

Новое знамение благоволения Божия даровася тебе, отче преподобие, яко и в нощи свет великий блиста тебе, дивяся сему, зовем ти радостно:

Радуйся, собеседниче сил небесных.

Радуйся, монахов множества наставниче.

Радуйся, созерцателю Божественных видений.  
Радуйся, причастниче небесных озарений.  
Радуйся, преподобный Александре, светильниче  
всесветлый и вселюбимый!

### **Кондак 8**

Странно и дивно, како, преподобне отче, вся  
Божиим поспешением в обители устроив, со  
ученики твоими неумолчно возносил хвалу  
Господу: Аллилуиа!

### **Икос 8**

Всего себе предал еси воле Господней,  
священства благодати не уклонился восприятия,  
аще и ужасался дух твой высоты сия, но  
послушание явил еси отцу твоему духовному,  
подвизая всех согласно звати тебе:  
Радуйся, Бескровная Жертвы достойный  
совершителю.  
Радуйся, Алтаря Господня благоговейный  
служителю.  
Радуйся, преподобнии руце твои ко Господу со  
многим дерзновением возносивый.  
Радуйся, свеще, в молитве Богу возженная.  
Радуйся, вождю благоискусный духовный.  
Радуйся, преподобный Александре, светильниче  
всесветлый и вселюбимый!



## **Кондак 9**

Вси иноцы обители твоея в радостный трепет приидоша, егда молитвою твоею и подвигом трудов твоих обитель их благоукрасися, вся духовная чада твоя всеумиленно возгласиша Зиждителю Богу: Аллилуиа!

## **Икос 9**

Витийство человеческое не возможет изрещи обилие радости духовныя, еяже преисполнился еси, отче Богоносне Александре, тем же мы радостне приносим ти глаголы сия:

Радуйся, благоволением Божия Матери осененный.

Радуйся, Христом Богом утешенный.

Радуйся, даром чудес облагодатствованный.

Радуйся, будущее, яко настоящее провидевый.

Радуйся, преподобный Александре, светильниче всесветлый и вселюбимый!

## **Кондак 10**

Спасти хотя души ученик твоих, отчески назидал еси их, Богомудре, с любовью увещевал преуспевати в благочестии и Богу воспевати: Аллилуиа!

## **Икос 10**

Стена крепка молитвы твоея, отче преподобне Александре, всем с верою к тебе притекающим

во всякой скорби душевной и телесной, тем же зовем ти:

Радуйся, печальных утешение.

Радуйся, бедствующим помощи.

Радуйся, в темнице сидящим избавление.

Радуйся, больных исцеление.

Радуйся, преподобный Александре, светильниче  
всесветлый и вселюбимый!

### **Кондак 11**

Пение всеумиленное принесл еси Господу во  
время кончины твоя; молитве сущей во устех  
твоих, предал еси душу свою в руке Живаго  
Бога, Его же от юности возлюбил еси и до  
старости маститой Ему работал еси, тем же и  
радостно пришел еси во обитель небесную,  
идеже со Ангельскими лики поеси  
Триипостасному Богу: Аллилуиа!

### **Икос 11**

Мирную кончину твою видевшие ученицы твои,  
угодниче Божий, скорбь разлучения с тобою  
утешением благодатным раствориша в уповании  
всесильного предстательства твоего у Престола  
Божия, идеже слышиши с любовью зовущих  
тебе:

Радуйся, венец бессмертных жизни от руки

Вседержителя приявый.

Радуйся, в Чертоге Небеснем ликовствуяй.

Радуйся, Небеснаго Сиона жителю.  
Радуйся, лучами Божественного Света сияющий.  
Радуйся, преподобный Александре, светильниче  
всесветлый и вселюбимый!

### **Кондак 12**

Благодати причастник был еси, чудотворче  
святой Александре, ты бо и по мнозех летех яви  
нам Господь заступника, всяк недуг  
врачующего, и исцеление источающего силою  
Господа, Ему же воспеваем: Аллилуиа!

### **Икос 12**

Поюще песнь, радостную хвалу и благодарение  
Человеколюбцу Господу, прославльшему ты в  
стране Российстей, молим ты, преподобие отче,  
буди ходатай к Нему и молитвенник о нас,  
зовущих ти:

Радуйся, цвете, благоуханный святою  
Церковью.

Радуйся, заре бессмертия, нам воссиявшая.

Радуйся, о душах наших предстателю.

Радуйся, телес наших врачевателю.

Радуйся, преподобный Александре, светильниче  
всесветлый и вселюбимый!

### **Кондак 13**

О, преславный угодниче Божий, отче наш  
Александре, милостиво прияв от нас сие малое

благодарственное пение, молитвами твоими  
сохрани нас от всяких недугов душевных и  
телесных и от грядущих мук избави, да вкупе с  
тобою в Царствии Небесном поем Богу:  
Аллилуиа!

